



XU  
VEN  
TU  
DE



XUNTA  
DE GALICIA



REGULAMENTO  
PARLAMENTO XOVE 2021



<b>1</b>	<b>Normas xerais</b>	<b>3</b>
<b>2</b>	<b>Organización do Parlamento Xove</b>	<b>3</b>
<b>3</b>	<b>Inscripción de equipos e funcións dos participantes</b>	<b>3</b>
<b>4</b>	<b>Temas de debate</b>	<b>7</b>
<b>5</b>	<b>Fases da competición</b>	<b>8</b>
<b>6</b>	<b>Calendario</b>	<b>8</b>
<b>7</b>	<b>Criterios de avaliación, sistema de puntuación e penalización</b>	<b>9</b>
<b>8</b>	<b>Lingua</b>	<b>13</b>
<b>9</b>	<b>Características dos debates</b>	<b>13</b>
<b>10</b>	<b>Dirección técnica e membros do xurado</b>	<b>17</b>
<b>11</b>	<b>Reclamacións</b>	<b>18</b>
<b>12</b>	<b>Concurso voluntario de artigos</b>	<b>18</b>
<b>13</b>	<b>Premios</b>	<b>19</b>
<b>14</b>	<b>Contexto Covid-19</b>	<b>20</b>



## 1. NORMAS XERAIS

Este regulamento será a norma básica pola que se rexerá a duodécima edición do Parlamento Xove (PX'21).

Por motivos de forza maior, ou por decisión xustificada da organización, poderán establecerse excepcións en canto ao establecido neste regulamento. Os equipos afectados por posibles cambios serán avisados con tempo suficiente a través dun comunicado da organización.

A organización do Parlamento Xove resérvase o dereito de utilizar o nome e a imaxe dos participantes no relativo ao desenvolvemento da competición con finalidade publicitaria.

## 2. ORGANIZACIÓN DO PARLAMENTO XOVE

A Dirección Xeral de Xuventude, Participación e Voluntariado convoca o Parlamento Xove.

Entre as funcións da organización referentes o apartado de competición atópanse:

- Elaboración do regulamento de competición e as bases de cada edición.
- Organizar as xornadas de formación previa dos equipos inscritos.
- Selección dos temas de debate da competición.
- Elección da sede de cada edición.
- Busca, selección e formación dos xuíces que formarán os xurados dos debates.
- Elección dos compoñentes da dirección técnica.

## 3. INSCRICIÓN DE EQUIPOS E FUNCIÓNS DOS/AS PARTICIPANTES

### 3.1. PARTICIPANTES

Todas as categorías comparten o regulamento pero as datas de celebración dos encontros poderían ser distintas. Segundo as diferentes categorías existentes, poderá participar na competición os seguintes grupos de alumnado:

- Categoría de ESO: de 3º e 4º da ESO de calquera centro de ensino de Galicia.
- Categoría de Bacharelato: de 1º e 2º de Bacharelato de calquera centro de ensino de Galicia.
- Categoría de Universidade: todos os mozos e mozas estudantes de grao dos sete campus universitarios das tres universidades galegas matriculados/as no curso académico 2020/2021.

### 3.2. PRAZAS:

Nesta edición do Parlamento Xove poderán inscribirse un total de 24 equipos en ESO, 24 en Bacharelato e 8 na categoría universitaria.

As prazas outorgaranse por estrita orde de inscrición, facendo unha listaxe de agarda cos centros non seleccionados.

### 3.3. EQUIPOS:

#### **3.3.1. Número de equipos por centro:**

Nas categorías de ESO e Bacharelato, cada centro educativo poderá inscribir, como máximo, dous equipos por categoría; pero no caso de que as inscricións excedan o número de prazas ofertadas, finalmente só poderán inscribir un equipo por categoría, co obxectivo de facilitar a participación de centros que nunca o fixeran ou que participaran nun menor número de ocasións.

No caso da Universidade, cada campus universitario poderá preinscribir tantos equipos como considere. O primeiro equipo preinscrito de cada campus terá automaticamente confirmada a inscrición. O segundo e seguintes equipos pasarán á lista de espera. Unha vez haxa un equipo inscrito de cada campus ou cando remate o período de preinscrición, comezarase a adxudicar praza por rigoroso orde de inscrición aos segundos equipos de cada campus. Se despois deste proceso aínda quedan vacantes, adxudicarase praza aos terceiros equipos de cada campus, e así sucesivamente.

#### **3.3.2. Composición dos equipos:**

O equipo de debate componse por catro membros e unha persoa coordinadora pertencentes ao centro educativo ao que representan. Cada coordinador ou



coordinadora representará soamente a un equipo; deste xeito, se un centro presenta dous equipos ten que ter dúas persoas coordinadoras. Excepcionalmente, permítese un só coordinador ou coordinadora para dous equipos sempre e cando asuma as consecuencias dos posibles solapamentos entre encontros. En ningún caso, a organización cambiará de horario ou de orde os encontros para impedir este solapamento coa finalidade de incorrer en agravios sobre terceiros.

Na categoría Universitaria, o equipo de debate estará formado por un mínimo de 2 estudantes e un máximo de 4. Un dos membros do equipo actuará como coordinador/a /representante ante a organización e o xurado. Cada coordinador/a representará soamente a un equipo; deste xeito, se un campus universitario presenta dous ou máis equipos ten que ter tantas persoas coordinadoras como equipos participantes.

### ***3.3.3. Funcións dos membros do equipo:***

A persoa coordinadora actuará como asesora e preparadora do equipo e será a súa representante ante a organización do Parlamento Xove. A elección e designación desta figura dependerá do propio equipo ou do centro de ensino. Nas categorías de ESO e Bacharelato, deberá ser un profesor ou profesora en activo ou unha persoa que forme parte do PAS.

Os oradores ou oradoras exporán oralmente as liñas argumentais do seu equipo, refutarán ao contrario, farán as conclusións dos debates, establecerán as argumentacións principais, colaborarán na pescuda da información e poderán realizar preguntas nos debates.

### ***3.3.4. Indumentaria:***

Todas as persoas que compoñen o equipo deberán vestir apropiadamente considerando as características da competición (trátase dunha comparecencia en público e estase representando a unha institución educativa). Se o xurado ou a organización consideran pouco apropiada a indumentaria dalgún dos participantes, comunicaranos á persoa coordinadora do equipo correspondente antes do inicio do debate para que actúe en consecuencia. Cando así o consideren, os equipos poderán vestir uniformados.



As persoas participantes poden levar publicidade discreta do centro que representen, sendo previamente comunicado á organización. Igualmente, non se permitirán mensaxes ou *slogans* na vestimenta.

### 3.4. INSCRIPCIÓN:

Os centros educativos e equipos universitarios que desexen participar deberán enviar telematicamente **o formulario de participación** dispoñible na páxina web xuventude.xunta.es desde o 10 de decembro de 2020 ata o 15 de xaneiro de 2021.

Os centros educativos que se anotaron a través do Plan Proxecta, teñen que enviar o formulario de participación como o resto dos centros. De non enviálo entendemos que desisten da súa participación na competición.

Unha vez adxudicadas as prazas (por categoría), os equipos seleccionados deberán enviar por correo electrónico **o formulario de inscrición** (inclúe a composición do equipo) antes do 22 de xaneiro de 2021, nas categorías escolares. No caso da categoría universitaria, o prazo amplíase ata o 22 de febreiro.

O formulario de inscrición e as autorizacións poderán descargarse da páxina oficial da competición, á que se accederá a través da antedita páxina web.

Xunto co formulario de inscrición enviarase a seguinte documentación:

a. Para todas as categorías:

- Fotocopia do DNI/NIE de cada unha das persoas que integran o equipo, incluído o coordinador/a.

b. Para as categorías escolares, ademais:

- Fotocopia da matrícula ou certificado de matriculación dos alumnos e alumnas.
- Autorización paterna/ materna /titor/a legal para que os/as menores de idade poidan participar no programa Parlamento Xovei 2021.
- Autorización paterna/materna/titor/a legal para facer fotografías e gravar a imaxe dos/as menores participantes durante o desenvolvemento das actividades do programa Parlamento Xovei 2021.

c. Para a categoría universitaria, ademais:

- Fotocopia da matrícula ou certificado de matriculación das persoas integrantes do equipo

Tódolos anteditos documentos (formulario de inscrición debidamente asinado e documentación complementaria) deberán enviarse ao correo electrónico: [parlamentoxove.xuventude@xunta.gal](mailto:parlamentoxove.xuventude@xunta.gal).

#### **3.4.1. Cambios:**

Permitiranse realizar cambios con respecto aos compoñentes especificados na composición de equipos ata unha semana antes do inicio da competición. A posteriori, non estará permitido realizar ningún cambio salvo por causas de forza maior debidamente xustificada.

Se durante a competición, un centro de ensino participa con dous equipos, non estará permitido realizar ningún intercambio entre os compoñentes destes.

No caso de que un centro educativo participe con dous equipos e un deles quede eliminado, os compoñentes do equipo eliminado non podrán formar parte do outro equipo.

En canto á persoa coordinadora nas categorías de ESO e Bacharelato, permitirase a súa substitución sempre e cando sexa por motivo xustifico.

## **4. TEMAS DE DEBATE**

A Consellería de Política Social formulará o tema de xeito dicotómico ou a modo de pregunta ou afirmación que dea lugar a posturas opostas, cada unha das cales será defendida por cada equipo en función do resultado do sorteo que terá lugar antes de que se inicie o debate.

O tema da fase clasificatoria nas categorías escolares será o seguinte:

### **TEMA FASE CLASIFICATORIA**

**Debería un estado establecer como obrigatoria a vacinación entre a súa poboación?**

A concreción do tema da fase final, para as tres categorías, farase pública na web unha vez se supere a fase clasificatoria inicial das categorías de ESO e Bacharelato.

## 5. FASES DA COMPETICIÓN

En todos os debates, os dous equipos que se enfrontarán en cada encontro defenderán posturas opostas: un asumindo a postura A FAVOR e o outro a postura EN CONTRA, que se decidirá por sorteo minutos antes do comezo do debate.

A competición constará de fase clasificatoria -na ESO e Bacharelato- e fase final de eliminatoria directa.

### 5.1. FASE CLASIFICATORIA:

O desenvolvemento desta fase nas categorías de ESO e Bacharelato e o número de debates que se disputen nela dependerán do número de equipos inscritos. A distribución e temporalización de emparellamentos publicarase tras a realización dun sorteo público o día anterior ao inicio dos debates e se coñeza o número exacto de participantes. O número de equipos participantes tamén pode provocar cambios nas datas e lugar de realización previstos.

A categoría universitaria non ten fase clasificatoria.

### 5.2. FASE FINAL:

En todas as categorías, os oito equipos mellor clasificados debaterán sobre un novo tema na fase final de eliminatoria directa, composta por cuartos de final, semifinais e final. Faranse varios encontros dialécticos que seguirán idéntico sistema ao da fase anterior.

## 6. CALENDARIO

A Dirección Xeral de Xuventude, Participación e Voluntariado establece o seguinte calendario:



CALENDARIO PARLAMENTO XOVE 2021	
<i>Envío do formulario de participación</i>	<i>Do 10 de decembro de 2020 ata o 15 de decembro de 2021</i>
<i>Envío do formulario de inscrición e documentación</i>	<i>Desde adxudicación de prazas ata: - 22 de xaneiro (ESO e Bach) - 22 de febreiro (Universidade)</i>
<i>Fase clasificatoria de ESO e Bacharelato</i>	<i>Febreiro/marzo 2021</i>
<i>Fase final das tres categorías</i>	<i>Abril/maio 2021</i>

As datas exactas, así como o lugar de realización dos debates dialécticos serán publicadas no portal web do Parlamento Xove e notificadas por correo electrónico ao coordinador/a de cada equipo, con antelación suficiente. O feito de estipular estas datas de entrega de documentación é por motivos organizativos, o que non exime de que os equipos poidan empezar a preparar cada unha das actividades a partir do momento en que teñan confirmada a súa inscrición na competición.

## 7. CRITERIOS DE AVALIACIÓN, SISTEMA DE PUNTUACIÓN E PENALIZACIÓN

### 7.1. CRITERIOS DE AVALIACIÓN E SISTEMA DE PUNTUACIÓN:

#### 7.1.1. Actuación do xurado:

O xurado decidirá en cada debate cal foi o equipo que defendeu con máis solvencia a súa tese e iso porase por escrito na *acta do debate*. Para isto, cada membro do xurado cubrirá un documento que formará parte da acta, no que se detallan os criterios de avaliación nos que baseará a súa decisión,



establecendo cal foi o equipo que cumpriu mellor cada un deles. Rematado o debate, sumaranse os puntos de cada xuíz e restaranse os que procedan de sancións. Obterase así o veredicto do xurado.

### **7.1.2. Sistema de puntuación e promoción de fase:**

**Fase clasificatoria:** tal e como foi detallado en apartados previos, os equipos debaterán entre si, cunha distribución e temporalización de emparellamentos que se fará pública o día anterior ao inicio dos debates e se coñeza o número definitivo de participantes.

En cada debate participará un grupo impar de xuíces/zas que, rematado o debate, sumarán as puntuacións que lle outorgaron a cada equipo e restarán as sancións. O equipo que obteña a maior suma de puntos será o que gañe o debate.

Para pasar á seguinte fase terase en conta, en primeiro lugar, o número de debates gañados, colocándose nos primeiros postos aqueles que superaran máis encontros. En caso de empate, seguiranse as directrices marcadas no apartado 7.3 deste regulamento.

**Fase final:** consta de tres etapas (cuartos de final, semifinal e final) de eliminatoria directa: o equipo que gañe cada debate será o que pase automaticamente á seguinte etapa.

### **7.1.3. Número impar de equipos:**

No caso de que o número de equipos participantes na fase clasificatoria sexa impar, no momento de realizar o sorteo dos emparellamentos o equipo que resulte ser o último no momento do sorteo realizará dous debates (non tres) e respecto do debate non realizado:

- Computarase o debate como gañado.
- A puntuación para o debate será a media aritmética dos puntos obtidos nos dous debates realizados na fase clasificatoria.

No caso da categoría universitaria, se o número de equipos participantes é impar, no momento de realizar o sorteo dos emparellamentos o equipo que resulte ser o último no momento do sorteo pasa automaticamente á seguinte eliminatoria.



#### **7.1.4. Criterios de avaliación:**

Para valorar a actuación de cada equipo, os/as xuíces/as empregarán diversos criterios de avaliación que afecten a cuestión de fondo, forma, visión de equipo e estrutura do debate; con anterioridade aos primeiros debates, o equipo de xuíces detallará todos e cada un dos criterios e facilitará a puntuación que se atribúe a cada un deles.

En caso de empate na puntuación total trala suma dos resultados dos tres xuíces, o criterio para o desempate será o que estableza a maioría de persoas do xurado no ítem de competición (quen convenceu máis no conxunto do debate).

#### **7.2. PENALIZACIÓNS:**

**a. Avisos:** Trátase simplemente dunha advertencia oral, que realizará o xuíz principal polas seguintes causas:

- Prolongación durante máis de dez segundos da exposición unha vez finalizada a súa quenda.
- Acurtar a exposición en máis de trinta segundos do tempo máximo asignado á quenda.
- Interrupción dun orador ou oradora do equipo contrario durante a súa exposición en calquera momento do debate sen que este dese permiso para iso.
- Realización dunha interpelación que dure máis de 15 segundos.
- Realización dunha interpelación no “minuto protexido”.
- A comunicación, verbal e non verbal, co profesorado acompañante.

**b. Faltas leves:** A realización por parte dun equipo dunha falta leve suporá a perda de 5 ítems no total da valoración feita polo xurado nese debate.

Considéranse faltas leves:

- A acumulación de dous avisos.
- Enunciación dunha cita ou dato falso. Se un equipo dubida da veracidade ou da orixe dun dato achegado polo equipo contrario, levantará a man cando finalice o debate e comunicará isto en voz alta. O equipo deberá mostrar a fonte rigorosa desa evidencia



durante os seguintes 10 minutos tralo final do debate, de xeito que o xurado poida desestimar a impugnación ou, en caso contrario, terá que aplicar a penalización correspondente.

- A realización de dúas intervencións por parte dun só orador ou oradora.
- Falta de puntualidade ata 5 minutos.
- A comunicación, verbal e non verbal, co público.

**c. Faltas graves:** Unha falta grave suporá que o equipo perda o debate no que se produza a falta. Considéranse faltas graves:

- A acumulación de dúas faltas leves no mesmo debate.
- Falta de puntualidade ata 10 minutos. Se se excede este tempo considerarase non presentado.
- Actitude que demostre ofensa ou menosprezo con respecto ao equipo contrincante, ao público ou ao xurado.
- Comportamento inadecuado (presións antideportivas, insultos, discriminacións de calquera tipo ad hominem ou dentro do seu discurso cara grupos sociais, raciais, relixiosos etc.)

Ademais, durante o debate, o/a xuíz/a principal poderá realizar observacións en relación ao desenvolvemento, que non suporán sanción ningunha, senón que serán parte do seu traballo á hora de garantir o normal desenvolvemento do evento.

**No caso de darse unha falta grave no transcurso dun debate ou a non presentación dun equipo a un/s debate/s:**

- O equipo infractor perde o debate e computará 0 puntos nese debate.
- Ao equipo contrario computáraselle o debate como gañado e a puntuación nese debate obterase a través da media aritmética dos puntos obtidos no resto dos debates de toda a fase clasificatoria.

**d. Expulsións:** o/a xuíz/a principal ten a potestade para expulsar a calquera compoñente do equipo ou a persoas do público se desenvolven un comportamento indebido durante o debate.

A dirección técnica estudará posibles incidentes ocasionados durante a competición, así como os casos en que se produza unha acumulación de

penalizacións, tanto por parte dun equipo como por un dos seus membros e poderá descualificar a un equipo ou a un/ha participante temporalmente. O seu fallo verase acatado polas partes implicadas.

A organización resérvase o dereito de expulsión dun equipo da competición se considera que existen causas xustificadas durante o desenvolvemento do evento.

### 7.3. DESEMPATES:

En caso de empate entre dous equipos na fase clasificatoria, atenderase aos seguintes criterios:

1. Maior número de debates gañados
2. Suma total da puntuación obtida polo equipo nos debates
3. Menor número de faltas graves
4. Menor número de faltas leves
5. Menor número de avisos
6. Resultado dun debate de desempate

## 8. LINGUA

Tomando como referencia o propio regulamento do Parlamento de Galicia, o galego e o castelán serán as linguas oficiais do Parlamento Xove. As persoas participantes no debate poderán facer uso, indistintamente, de ambos os dous idiomas.

## 9 CARACTERÍSTICAS DOS DEBATES

### 9.1. Os contendentes:

Nos debates enfrontaranse dous equipos, formado cada un deles por catro membros. Ademais, é indispensable a presenza dun coordinador ou coordinadora.

Os membros do equipo serán catro (4) oradores ou oradoras que realizarán as intervencións retóricas nas súas diferentes quendas: exposición inicial, refutacións e conclusións. Será decisión do equipo o seu modo de intervención, pero sempre participarán catro persoas oradoras en cada debate. Na categoría universitaria, participarán entre dúas (2) e catro (4) persoas que realizarán as mesmas intervencións retóricas.

A persoa coordinadora inscrita no Parlamento Xove será a que forme parte do equipo, non podendo facerse cambios, agás en caso de forza maior e se xustifique debidamente.

A persoa coordinadora entregará á presidencia do tribunal de cada debate un escrito (folla de equipo) cos nomes dos membros do equipo antes de empezar cada debate. As follas de equipo de ambos os equipos serán engadidas ás actas ao final do debate. A designación de persoas que realizan cada quenda poderá variar dun debate a outro.

O coordinador ou coordinadora situarase na sala de debate, durante o seu transcurso, entre o público, NON podendo comunicarse con el (ou viceversa) por ningunha vía.

### **9.2. Posturas que se adoptan:**

Nos debates, os equipos participantes defenderán posturas opostas: un equipo defenderá a postura A FAVOR e o outro, a postura EN CONTRA.

Tal e como se establece no apartado 5 deste regulamento, durante toda a competición, a postura que vai adoptar cada equipo decidirse por sorteo minutos antes do comezo do debate.

Levará a cabo este sorteo o presidente ou presidenta do tribunal do debate, en presenza das persoas coordinadoras dos equipos participantes.

### **9.3. Procedemento do debate:**

A postura A FAVOR será a que comece o debate. As quendas de participación dos equipos durante os debates seguirán esta orde:

- AF (A Favor) Exposición Inicial: 4 minutos.
- EC (En Contra) Exposición Inicial: 4 minutos.
- AF Refutación: 5 minutos.
- EC Refutación: 5 minutos.
- AF Refutación: 5 minutos.
- EC Refutación: 5 minutos.
- EC Conclusións: 3 minutos
- AF Conclusións: 3 minutos.



Duración total do debate: 34 minutos.

#### **9.4. Interpelacións:**

Os/as oradores/as poden interpelar a un orador ou oradora do equipo contrario durante a súa exposición, coa intención de realizar observacións, preguntas ou comentarios. Solicitará a palabra erguendo a man.

Durante a exposición inicial e as conclusións, as persoas oradoras non poderán ser interrompidas. As interpelacións só poderán realizarse nas quendas de refutación.

Tampouco será posible realizar interpelacións durante o último minuto da intervención do/a refutador/a de cada refutación, xa que é o denominado “minuto protexido”.

O orador/a–refutador/a contará con liberdade para conceder a palabra e para responder ou non. O cronómetro non se parará, así que tanto a interpelación (que non poderá durar máis de 15 segundos) como a resposta, contarán como tempo de intervención do orador ou oradora.

A realización dunha interpelación no “minuto protexido” será considerado un aviso para o equipo que realice a dita interpelación.

#### **9.5. Material utilizado en cada debate:**

##### a) Material complementario:

Para complementar a súa exposición oral, os equipos poderán utilizar o material que consideren necesario, sempre e cando se axuste ás dispoñibilidades técnicas da sala de debate. Estas dispoñibilidades serán comunicadas aos equipos con antelación.

O tempo non se parará en ningún caso pola utilización de material de apoio. Isto é: a disposición de transparencias, diapositivas, vídeos etc... contarán como tempo de intervención.

##### b) Notas:



Durante as exposicións, as persoas oradoras poden recibir apoio do seu equipo en forma de notas. Ningún dos compoñentes do equipo se erguerá dirixíndose ao atril, senón que será sempre o orador ou oradora o que se achegue á mesa.

En ningún caso os compoñentes do equipo ou do xurado poderán recibir información do público asistente na sala durante o debate.

c) Relación de evidencias:

Os equipos deben dispoñer durante o debate de evidencias de todos os datos conseguidos na investigación. Así, se o equipo contrario solicita a verificación dun dato, demostrarán a súa autenticidade ao rematar o encontro dialéctico.

Se esa evidencia non se atopa na documentación que dispón o equipo e non consegue atopala polos seus propios medios, quedará a criterio do xurado a consideración dese dato como falso.

#### **9.6. A sala de debate:**

Sen prexuízo do disposto no punto 14, a sala de debate contará con:

- Un atril.
- Dúas mesas (unha para cada equipo) que estarán situadas en fronte do atril, de forma que o orador ou oradora teña os dous equipos dentro do seu ángulo de visión.
- Un ou varios reloxos. Colocaranse de xeito que estean dentro do campo de visión dos oradores/as e equipos.
- Un espazo reservado para o xurado, desde onde teñan unha perspectiva apropiada e poidan ver tanto o atril como os elementos de apoio que utilicen os equipos para complementar as súas exposicións.
- Un espazo habilitado para o público, cunha separación apropiada con respecto o xurado e os equipos.

En ningún debate poderá aparecer dentro da sala publicidade ningunha, agás a permitida pola organización.





Durante o desenvolvemento dos debates, o persoal auxiliar procurará o máximo silencio na sala limitando o acceso. Igualmente estará prohibido o uso do teléfono móbil.

## 10. DIRECCIÓN TÉCNICA E MEMBROS DO XURADO

### 10.1. A DIRECCIÓN TÉCNICA:

En cada edición do Parlamento Xove nomearase unha dirección técnica cuxa composición se fará pública no torneo.

As súas funcións serán:

- Velar polo cumprimento do presente regulamento por parte do xurado e dos/as integrantes dos equipos.
- Recoller e resolver as reclamacións formais dos equipos, así como as sancións disciplinarias impostas polo xurado dun debate, e elevalas ao comité de competición, que será o que resolva.
- Interpretar este regulamento e as bases de cada edición en caso de dúbida.

### 10.2. O XURADO:

O xurado de cada fase estará formado por un presidente ou presidenta de tribunal e un número par de xuíces ou xuízas auxiliares. Escolleranse e designaranse pola organización, tendo como criterio de selección, a súa formación e experiencia académica en actividades relacionadas coa temática tratada, coa literatura, a investigación, a oratoria, a comunicación, a pedagogía, a lóxica, etc. Todos os xuíces e xuízas recibirán un curso de formación previo para unha maior uniformidade nos criterios de valoración.

#### **10.2.1. Presidencia do xurado:**

As e os membros do xurado de cada debate estarán presididos por un xuíz ou xuíza responsable de que se cumpra o regulamento. Nos debates, esta persoa será a moderadora do debate, presentará os equipos e realizará o sorteo de posturas. Encargarase tamén de recoller as observacións que fagan as persoas do xurado, e mesmo as e os participantes no debate, respecto do regulamento.



Tomará as decisións de expulsión ou descualificación por penalizacións colexiadamente co resto de integrantes presentes no xurado. Esta decisión comunicárase á dirección técnica.

## **11. RECLAMACIÓNS**

### **11.1. OBXECCIÓNS:**

Se un equipo observa que o equipo contrario cometeu algunha infracción durante a súa intervención no debate, poderá comunicarllo ao xurado por medio da persoa coordinadora. Poderá facelo ao finalizar o debate para evitar que esta obxección inflúa no desenvolvemento do mesmo e informárase ao coordinador ou coordinadora do equipo contrario.

Non poderá facerse obxección ningunha unha vez transcorridos dez minutos despois da finalización do debate.

Será o xurado o que decida se estima ou desestima a obxección. En calquera caso quedará recollida na acta xunto cos motivos de estimación ou desestimación.

### **11.2. RECLAMACIÓNS FORMAIS:**

As reclamacións formais poderán ser formuladas polos equipos ata unha hora despois de finalizado o debate, en caso de que estimen que o xurado ou un dos seus xuíces non respectou o regulamento do torneo. Indicará os apartados que foron vulnerados.

Esta solicitude de impugnación do debate entregarase á dirección técnica que tomará unha decisión ao respecto.

Non se aceptarán impugnacións ao veredicto do xurado se se respectou o regulamento da competición.

## **12. CONCURSO VOLUNTARIO DE ARTIGOS EN ESO E BACHARELATO**

### **12.1. CARACTERÍSTICAS DOS ARTIGOS:**

De xeito paralelo e complementario aos debates, realizarase un campionato de artigos de investigación. Unha vez proposto o tema pola organización, os

equipos poderán elaborar dous artigos con posicións opostas: un defenderá a postura A FAVOR e outro defenderá a postura EN CONTRA.

Terán como extensión máxima un folio cada un, con letra tipo Times New Roman sen comprimir, tamaño 12 e interliñado 1,5. Cada artigo levará un título propio, estará asinado polo seu autor/a e detallarase o centro ao que pertence.

Enviarase en formato dixital ao enderezo electrónico [parlamentoxove.xuventude@xunta.gal](mailto:parlamentoxove.xuventude@xunta.gal) ata un día antes do día de inicio dos debates da fase clasificatoria de cada categoría.

### 12.2. CRITERIOS DE AVALIACIÓN:

As e os membros do xurado terán en conta, principalmente, os seguintes criterios á hora de puntuar os artigos:

1. Orixinalidade e autenticidade nas ideas plasmadas.
2. Presenza de argumentacións sólidas que defendan con solvencia a postura correspondente.
3. Organización e conexión entre as ideas defendidas.
4. Creatividade e riqueza na utilización de figuras estilísticas.
5. Corrección lingüística.

### 12.3. PENALIZACIÓNS:

Se o xurado comproba o plaxio parcial ou total nas argumentacións do artigo, o equipo será penalizado coa expulsión da competición. No caso de empregar extractos literais de diversas fontes, será de obrigatorio cumprimento citar a dita fonte ao pé de páxina.

### 13. PREMIOS

1. Os equipos gañadores do Parlamento Xove: unha viaxe para os/as cinco integrantes do equipo de ESO e Bacharelato valorada en 5.000 € e de 2.500 € na categoría universitaria
2. O equipo finalista: un agasallo a cada un dos/das cinco integrantes do equipo.
3. O equipo cuxo artigo de investigación fose o mellor valorado: un agasallo a cada un dos/das cinco integrantes do equipo.



- Os/as integrantes do xurado poden facer mencións especiais daqueles/as oradores/as que lles parezan máis brillantes nas súas execucións considerando os criterios de avaliación establecidos. O alumnado distinguido con esta mención recibirá un diploma acreditativo emitido pola Dirección Xeral de Xuventude, Participación e Voluntariado.

#### 14. CONTEXTO COVID-19

A Consellería de Política Social terá en conta, no desenvolvemento deste programa, as recomendacións de seguridade e saúde establecidas polas autoridades sanitarias en virtude da evolución da pandemia da Covid-19.

Neste senso, os debates da fase clasificatoria, que implica ás categorías de ESO e Bacharelato, realizaranse de modo *on line* na plataforma telemática establecida para o efecto. En todo caso, todos os centros educativos participantes nesta fase clasificatoria contarán co apoio técnico preciso por parte da Dirección Xeral de Xuventude, Participación e Voluntariado, co fin de favorecer a súa participación coas máximas garantías e seguridade técnica posible.